

**Namminersorneq pillugu inatsit tunngavigalugu isumaqatigiissutaasut oqartussaaffiit akisussaaffiillu nunatsinnut nuunneqartussat qanoq sunniteqassanersut qulaajaqqullugit Naalakkersuisut danskit naalakkersuisui peqatigalugit UKA17-imut ersarissaatinik nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Taamaalilluni oqartussaaffiit nunatsinnut nuunneqarpata ilisimaneqarsinnaaqqullugu oqartussaaffiit aalajangersimasut qanorpiaq sinaakkutissaqartut, aamma aningaasaqarnikkut qanoq nunatsinnut pisussaaffiliinersut.**

(Inatsisartunut ilaasortaq Aqqaluaq B Egede, Inuit Ataqtigiit)

## **Akissuteqaat**

(Naalakkersuisut Siulittaasuat)

### **1. Siullermeerneqarnera**

Siunnersuuteqartoq aalajangiiffigisassattut siunnersuummik saqqummiussineranut qutsavigaara.

Inatsisartut 2015-imi ukiakkut ataatsimiinneranni Naalakkersuisut oqartussaaffiit nunatsinnut angerlaassassarineqarsinnaasut ilanngussaq 1-imi allassimasut Namminersorlutik Oqartussat inatsisaani allassimasuni suliaassarfiit pineqartut pillugit Naalakkersuisut nalunaarusioqqullugit peqquneqarnissaannik Inatsisartuni aalajangiiffigisassatut siunnersuut Inatsisartunit akuersissutigineqarpoq. Siunnersuut kingusinnerpaamik UPA2018-imi Inatsisartunut saqqummiunneqartussanngortitaavoq, aalajangiiffigisassatullu siunnersuummut uunga imarisamigut assigilluni.

Siulittaasup Naalakkersuisoqarfiata Danmarkimi Finansministeria suleqatigalugu Namminersorneq pillugu Inatsimmi bilag 1-imi allassimasut massakkut Naalagaaffimmit ingerlanneqarnerinut aningaasartuutaasartut aallarniutaasumik misissuiffigileruttorpaat. Tassa taamatut misissuineq aallartinneqareerpoq.

Siunnersuutigineqartup uuma imarisaanut assingusumik suliamik aallartitsisoqarenera eqqarsaatigalugu Naalakkersuisut kaammattuutigerusuppaat siunnersuut tusaatissatut tiguneqassasoq aammalu siunnersuut una sulianut aallartinneqareersunut ilanngullugu Naalakkersuisunit suliarineqassasoq.

Taamatut oqaaseqarlunga aalajangiiffigisassatut siunnersuutip itigartitsissutigineqarnissaa inassutigaa.